



KOMUNIKADO PA PRENSA

Fecha 31 òktober 2012 *Account Manager* Jhanirha Anita *Email* jhanirha.anita@gobièrnu.cw *Nr.*

AYERA A TUMA LUGA SESHON DI INFORMASHON TOKANTE DESAROYO DI E TERENONAN NA OOSTPUNT

Willemstad - Ayera dia 30 di òktober e promé seshon di informashon den Sentro di bario Montaña a tuma lugá relashoná ku e konsepto di lei pa kambia di e zonifikashon (EOP) di e terenonan na Oostpunt. Un grupo grandi di interesado tabata presente pa skucha e ekspertonan kual a duna un splikashon amplio di kiko eksaktamente lo por tuma lugá riba e área aki.

Sr. Donald de Palm, Presidente di e komishon Oostpunt, kual ta un komishon ku gobièrnu a instalá pa e proyekto di Oostpunt, a splika ku den pasado gobièrnu mester a laga hasi un estudio pa kambio di EOP pa e área aki.

Pa por a logra haña un opinion imparisial gobièrnu a laga un kompania djafó hasi un estudio di kon lo por zonifika i desaroyá e área aki. Miéntras tantu e estudio ta kla i a keda presentá na e públiko interesá.

Sr. Ted Wolff, representante di e kompania Wolff Landscape Architecture, a splika detayadamente ku nan a haña e tarea pa identifiká e posibel áreanan ku lo por keda desaroyá. Ehèmpelnan di esaki ta na unda por bini hotèl, unda por bini un marina, skol, misa, urbanisashon, warda di polis i vários otro punto mas.

Sr. Wolff a splika ku si Gobièrnu den futuro permití desaroyo di e área, lo mester tene kuenta ku ampliashon di e kareteranan den e área.

Riba e tereno mes tin masha hopi área ku lo tin ku keda protehá pa nan karakterístikanan úniko. Di e forma aki ta konserva i mantené un balans a den nos naturalesa. Komunitat por keda trankil paso gobièrnu ta garantisá ku lo tene kuenta ku nos medio ambiente i nos naturalesa.

Otro eksperto ku tabata presente tabata Sr. Eric Schwarz di Langan Engineering. Sr. Schwarz a trata puntonan manera medio ambiente, awa, koriente, telefon, desagüe, riolering i vários punto mas.

Entrante dia 8 di novèmber próksimo i durante 30 dia despues di e fecha aki, tur interesado por pasa na ofisina di Ministerio di Tráfiko, Transporte i Planifikashon Urbano pa tira un bista riba tur dokumento relevante na e plan aki. Orario pa hasi esaki ta di 8:00 AM te ku 12:00 PM i di 1:30 PM te ku 5:00 PM i tambe por wak e dokumentonan via di e website di gobièrnu esta www.gobièrnu.cw.